



Minggu, 25 Juni 2023

Ogen: RUT 1:3-5



Kepaten



Sirang ras perbulangen maba kecedan i bas pusuh (sedih yang mendalam). Perbulangen e teman nggeluh si ibereken Dibata, ras-ras ndalani geluh perjabun, bas si meriah ras si pagit radu ras ngenanamisa. Lit tawa, lit ka perubaten si rusur ibentasi. Di kune perbulangen lanai i rumah, lanai lit teman rubat, e pe ndele ka nge ate. Melungun la terturiken, melenget bas pusuh, iluh lalap lit i bas mata. Kecedan ate e banci pulih tapi ndekah, banci seh 6 bulan ku 2 tahun, e pe adi rusur megi kata Dibata ras reh ku perpulungen. Bage me pengalamen Naomi i kuta Moab, kenca itadingkenna kutana Betlehem. Labo kepe keriahen si man nanamen i kuta Moab, tapi kecedan ate. Perbulangen Naomi ngadap man Tuhan. Anak-anakna erjabu man diberu Moap. Lenga keru ate ceda, kira-kira sepuluh tahun ringan i Moab, duana anakna; Mahlon bage pe Kilyon ngadap ka man Tuhan (mate). Labo tanggung suina pusuh Naomi ngalaken perbeben geluhna. Kepaten perbulangen e igelari mbalu i bas social masyarakat. Naomi la terjeng kepaten perbulangen tapi pe kepaten anak-anak tengah jabu. Kepaten e ertindih-tindih. Ulih kepaten e, Naomi kebenen erga diri, la kalak nari malang man bana. Naomi pe kebenen hak i tengah keluarga, erta-ertana si tading denga i kuta, e lanai banci jadi hakna. Ertana e jadi hak keluarga besar perbulangenna. Kebenen status, i Moab ia kalak pertandang, i Betlehem lanai lit inganna tading. Sima-simana pe lanai lit, gelah banci ia mulih ku keluargana ia arus itebus. Mbelin kal kecedan ate si inanami Naomi. Mberat i bas ndalani kegeluhen, usia enggo metua arus ndalani geluh si sada.

Si mehuli i bas Naomi, mulih ia ku kutana, ngatakensa mulih pe ia ku Dibata. Tek ia Dibata si ngaturken kerina geluhna. Ami pe pagit la ia sirang ras Tuhan.